

LIS PREDICJIS DAL MUINI

di pre Josef Marchet - Udin, 1965

L'aradio

Prin di dut o veis di savê che cheste volte no pues dius nuie sul cont dal orari di doman. O ai provât a bati il telefon e nissun mi rispuindeve: o sintivi nome a rugnî a tratis sot vie. Alore o ai distacat il cjeval di san Francesc e jù inte vile di Sot, cun dut che mi clopavin lis gjambis. Il plevan al jere lâ a Udin cu la gjespe, il capelan al jere ator, cui sa indulà, par malâts, e la perpetue no veve nissun ordin. Jo no podevi intardâmi plui di cussì e alore o ai scugnût cunvignî che mi fasin une telefonade dopo cene; e cun voaltris si justarìn in cheste maniere: se doman a buinore, tor lis siet o sintarês a sunâ la cjampane, al vûl dî che o varìn la messe ca sù; se no, avodaitsi a chel sant e lait a messe in plêf. Jo di miôr no sai ce fâ: la messe no pues dîle jo!

Cumò us e ai contade dute, come che e je. E se o veis un freghenin di pazienze, us indi conti une altre. Chel banducel di gno zinar, che al à di vê trentevot carûi tal curviel, ce si impensial di fâ? Chê altre dî al mi à mandade une di chês casselutis di len che a tabain dute la mari dal dî: un aradio, al vignarès a jessi. Sono tramais di mandâ a un puar vieli, che al è plui di là che no di ca, chei alî? Po ben, dal moment che al jere, o ai clamât Vigji Strossul a metimal in vore. Chel al è vignût orsere l'altre, al à sbisiât dôs oris daprûf dai fii dal eletric, al à strucjadis fûr une grampe di blestemis (ise colpe Jesus Crist se Vigji Strossul nol sa ben il mistîr di manovrâ chei argagns?) e po al à finît cul dîmi: - Cumò us va di gale! - e vie lui, lassant l'imprest daviert. Si sintive une fantate che e cjantave saio jo ce, e al pareve che e ves i dolôrs di panze, di tant che e zemeve. Jo, si sa, no ai pratiche di chel truc: o ai lassât che e cjantàs e che e zemès un pieçut; po dopo o ai lassat che al vignîs un om a dai di volte, cuntune sclendarute di vôs, juste come chê di Sdablin cuant che al cjante di cjoc fûr dal paîs; po une altre femine spirtade, po un altri om cu la vôs çondare come une coce di san Roc... E po mi soi stufat, che e jere ore di lâ sot la plete. Alore o ai provât a lâ dongje di cheste sçaçule e a menâ ator un di chei sbrissui che a son alî denant. O intindevi di sierâ buteghe. Ma lafè sî! L'imprest al à tacât a sgrasaîâ, a ronâ, a sivilâ, a craçâ, a vuicâ, a cjantâ di rusignûl, a sdrondenâ covertoriis, a sglinghignâ, a trombonâ, a ped... - Diu mal perdoni! - Sono robis di vignî fûr in cjase di un galantom chês alî?

Al ven a stâi che plui o menavi e piês al jere. O ai provât a zirâ chel altri sbrissul, come che o vevi viodût a fâ là vie di Baduscli, che al à implantât di dopo mai un parlament cussì. Marissante benedete! No alcial la vôs, che mi faseve trimâ lis ramadis dai barcons! Un bordel, un taramot, un cjadaldiaul! Vadî che o veis sintût ancje voaltris fintremâ tal borc de Roste, ce cualitât di infier. Ben, par fâle curte, jo o ai implantade la barache, che e sberghelàs tant che e voleve, e o soi lâ a durmî. A durmî? Cui podevial durmî cun chel burlaç in cjase? Al si cuietave, ogni tant, par cualchi minût, juste tant che o mi pierdevi vie, e po al tornave a tacâ cun plui gosate di prime, e al mi faseve petâ scjassons di colâ dal jet. Juste su lis oris piçulis al si è bonât un fregul, tant che o ai podût fâ un pisul. E tal doman di buinore o soi tornâ a

cirî Vigji Strossul che al mi sieràs une volte par simpri chel danât di masanin; che jo o soi in etât e no ai voie di fotis. E o ai scrite une cartuline a gno zinar, che al po vignî a cjolîsal cuant che al vûl, il so regâl.

Chest al sarès un spieli de civiltât di vuê: sintî ce che a disin in Americhe, o ce che a cjantin in Californie o ce che a sivilin in Pomeranie; viodi lis pituris a movisi e a fevelâ suntun linçûl; parâ fûr dal cîl i uciei par cori ator in svoladon sui nûi; lâ a spas dafonts dal mâr; passâ cul vapôr fûr par fûr des monts dopo vêlis foropadis... Bielis robis, robis grandis: nuie ce dî. Ma dute cheste ostrighe di mecaniche mi pâr che e finîs cul vuicâ, cul rugnî, cul vuagnâ, cul sdrondenâ e baste. O vuesti dî che cun chestis tantis invenziions il mont al è simpri plui un davoî: nol fâs un pas indenant su la strade di diventâ plui dret e plui bon. Al cres il sunsûr e al cjol la pâs e il sium. E ce puartial, dopo dut? Disêt mo ce che o volês: jo o cjati che si stave dibot miôr cuant che si stave mâl. Polente e formadi tal bultric e un grum di pâs tal cûr: no mo sî?

La mecaniche e à inventât il sunsûr e il sunsûr nol nudrîs ni la anime ni il cuarp, al jemple dome lis orelis e al sturnîs il çurviel. Fâ il diaul des robis che a disturbin e baste!

E cun cheste us doi la buine sere.